



# IZVJEŠTAJ

## O FINANSIJSKOJ REVIZIJI TUŽILAŠTVA BOSNE I HERCEGOVINE ZA 2012. GODINU

Broj: 01/02/03-07-16-1-496/13

Sarajevo, juni 2013. godine

**SADRŽAJ**

I MIŠLJENJE REVIZORA .....	3
II IZVJEŠTAJ O REVIZIJI .....	5
1. Uvod .....	5
2. Postupanje po ranijim preporukama .....	6
3. Sistem internih kontrola .....	6
4. Budžet .....	7
5. Pregled rashoda budžeta .....	8
5.1. Tekući izdaci .....	9
5.2. Kapitalni izdaci .....	12
6. Bilans stanja .....	12
7. Javne nabavke .....	14
8. Ostalo .....	14
9. Korespondencija .....	15
III PRILOG .....	16
FINANSIJSKI IZVJEŠTAJI I IZJAVA O ODGOVORNOSTIMA .....	16
Izjava o odgovornostima rukovodstva	
Pregled rashoda budžeta za 2012. godinu	
Bilans stanja na 31.12.2012. godine	

## I MIŠLJENJE REVIZORA

### *Uvod*

Izvršili smo reviziju finansijskih izvještaja (bilans stanja, pregled prihoda, primitaka i finansiranja, pregled rashoda budžeta po ekonomskim kategorijama, posebni podaci o plaćama i broju zaposlenih, pregled dinamike zapošljavanja i pregled stalnih sredstava u obliku stvari i prava) u **Tužilaštvu Bosne i Hercegovine** (u daljem tekstu: Tužilaštvo BiH) za godinu koja se završava 31. decembra 2012. godine i reviziju usklađenosti poslovanja sa odgovarajućim zakonima i propisima za 2012. godinu.

### *Odgovornost rukovodstva*

Rukovodstvo Tužilaštva BiH je odgovorno za pripremu i fer prezentaciju finansijskih izvještaja u skladu sa prihvaćenim okvirom finansijskog izvještavanja, tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu budžeta institucija BiH. Ova odgovornost uključuje i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže značajne pogrešne iskaze uslijed prijevare ili greške.

Pored odgovornosti za pripremu i prezentaciju finansijskih izvještaja, rukovodstvo Tužilaštva BiH potvrđuje da je tokom fiskalne godine osiguralo namjensko, svrsishodno i zakonito korištenje sredstava odobrenih budžetom institucije za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole u instituciji.

### *Odgovornost revizora*

Naša je odgovornost da izrazimo mišljenje o finansijskim izvještajima na osnovu revizije. Reviziju smo izvršili u skladu sa Zakonom o reviziji institucija Bosne i Hercegovine (Službeni glasnik BiH, broj 12/06) i primjenljivim Međunarodnim standardima vrhovnih revizionih institucija (ISSAI). Ovi standardi zahtijevaju da postupamo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže značajne pogrešne iskaze. Revizija uključuje obavljanje postupaka u cilju pribavljanja revizionih dokaza o iznosima i objavama u finansijskim izvještajima. Izbor postupka je zasnovan na prosuđivanju revizora, uključujući procjenu rizika značajnog pogrešnog prikazivanja u finansijskim izvještajima uslijed prijevare ili greške. Prilikom procjene rizika revizor razmatra interne kontrole koje su relevantne za pripremu i fer prezentaciju finansijskih izvještaja u cilju osmišljavanja revizionih postupaka koji su odgovarajući u datim okolnostima, ali ne u svrhu izražavanja mišljenja o efikasnosti internih kontrola. Revizija takođe ocjenjuje finansijsko upravljanje, funkciju interne revizije i sistem internih kontrola.

Pored odgovornosti za izražavanje mišljenja o finansijskim izvještajima, naša odgovornost je izražavanje mišljenja o tome da li su finansijske transakcije i informacije, po svim bitnim pitanjima, usklađene sa odgovarajućim zakonima i propisima. Ova odgovornost uključuje obavljanje procedura kako bi dobili revizione dokaze o tome da li se sredstva koriste za odgovarajuće namjene koje su određene zakonom i propisom. Ove procedure uključuju procjenu rizika od značajnih neslaganja sa zakonima.

Vjerujemo da su pribavljeni revizioni dokazi dovoljni i odgovarajući i da osiguravaju osnovu za naše mišljenje.



### **Mišljenje**

Prema našem mišljenju, finansijski izvještaji Tužilaštva BiH prikazuju fer i istinito, po svim bitnim pitanjima, stanje imovine i obaveza na 31.12.2012. godine i izvršenje budžeta za godinu koja se završila na navedeni datum u skladu sa prihvaćenim okvirom finansijskog izvještavanja.

Finansijske transakcije i informacije prikazane u finansijskim izvještajima Tužilaštva BiH u toku 2012. godine bile su u svim značajnim aspektima usklađene sa odgovarajućim zakonima i propisima.

### **Isticanje predmeta**

Ne izražavajući rezervu na dato mišljenje, skrećemo pažnju na nepostojanje plana djelovanja za efikasno provođenje programa za prevenciju korupcije (tačka 4. Izvještaja).

Sarajevo, 27.06.2013. godine

### **GENERALNI REVIZOR**

Milenko Šego

### **ZAMJENIK GENERALNOG REVIZORA**

Dževad Nekić

### **ZAMJENICA GENERALNOG REVIZORA**

Božana Trninić



## II IZVJEŠTAJ O REVIZIJI

### 1. Uvod

Tužilaštvo BiH je osnovano Zakonom o Tužilaštvu Bosne i Hercegovine<sup>1</sup>, kako bi se osiguralo efikasno ostvarivanje nadležnosti države Bosne i Hercegovine i poštovanje ljudskih prava i zakonitosti na njenoj teritoriji.

Ustav Bosne i Hercegovine uspostavio je nadležnost tužilaštava na entitetskom nivou, dok je Tužilaštvo BiH uspostavljeno naknadno kao institucija s posebnom nadležnošću za postupanje pred Sudom Bosne i Hercegovine u krivičnim djelima propisanim Zakonom o Sudu BiH, Zakonom o Tužilaštvu BiH, Krivičnim zakonom BiH, Zakonom o krivičnom postupku BiH, Zakonom o ustupanju predmeta od strane Međunarodnog krivičnog suda za bivšu Jugoslaviju tužilaštvima u BiH.

Nadležnost i područje djelovanja Tužilaštva BiH propisani su Zakonom o Tužilaštvu Bosne i Hercegovine, prema kojem je Tužilaštvo BiH:

- organ nadležan za provođenje istrage za krivična djela za koja je nadležan Sud Bosne i Hercegovine, te za gonjenje počinitelja pred Sudom Bosne i Hercegovine, u skladu sa Zakonom o krivičnom postupku Bosne i Hercegovine i drugim primjenjivim zakonima,
- organ nadležan za primanje zahtjeva za međunarodnu pravnu pomoć u krivičnim stvarima, u skladu sa zakonima, multilateralnim i bilateralnim sporazumima i konvencijama, uključujući i zahtjeve za izručenje ili predaju traženih lica od strane sudova ili organa na području Bosne i Hercegovine i drugih država, odnosno Međunarodnih sudova ili Tribunala,
- organ zadužen za izradu statističkog pregleda svojih aktivnosti (izvještaja o radu), te izradu informacije o stanju kriminaliteta u Bosni i Hercegovini i ukazuje na tendencije u njegovom kretanju. U zaključnom dijelu ove informacije Glavni tužilac može iznijeti prijedloge zakonskih reformi.

Tužilaštvo BiH nije nadređeno entitetskim tužilaštvima nego je njegova nadležnost ograničena na procesuiranje krivičnih djela propisanih gore navedenim zakonima.

Poslovi Tužilaštva BiH vrše se u skladu sa Ustavom i zakonima Bosne i Hercegovine, a obavljaju ih glavni tužilac BiH, dva zamjenika glavnog tužioca BiH i određeni broj tužilaca (u Tužilaštvu BiH rade domaći i međunarodni tužioci i osoblje). Glavnog tužioca i zamjenike glavnog tužioca bira i imenuje Visoko sudsko i tužilačko vijeće Bosne i Hercegovine iz reda tužioca u Tužilaštvu BiH. U sklopu Tužilaštva BiH osnovana su tri odjela i to: Posebni odjel za ratne zločine, Posebni odjel za organizovani kriminal i korupciju i Odjel III za krivična dijela iz nadležnosti Tužilaštva BiH koja nisu u isključivoj nadležnosti spomenuta dva odjela, privredni kriminal i korupciju.

Sjedište Tužilaštva BiH je u Sarajevu, ulica Kraljice Jelene broj 88.

<sup>1</sup> "Službeni glasnik BiH", br. 24/02, 3/03, 37/03,42/03, 9/04, 35/04, 61/04 i 97/09)

## 2. Postupanje po ranijim preporukama

Ured za reviziju institucija BiH izvršio je finansijsku reviziju Tužilaštva BiH za 2011. godinu i izrazio pozitivno mišljenje.

Osvrtom na preporuke revizije date u Izvještaju o reviziji za 2011. godinu te uvidom u preduzete aktivnosti, utvrdili smo sljedeće:

### Realizovane preporuke:

- Realizovana je preporuka koja se odnosi na izvještavanje lica angažovanih po osnovu ugovora o djelu na ekshumacijama,
- Nova Odluka kojom se regulišu plaće zaposlenih u Tužilaštvu BiH je primijenjena na budžetski okvir koji je odobren Tužilaštvu BiH za 2013.godinu,

### Preporuke u toku:

- Uočen je napredak kada je u pitanju rješavanje pitanja smještaja Tužilaštva BiH, a dalje aktivnosti su u toku.

### Nerealizovane preporuke:

- Ne vodi se evidencija o troškovima krivičnog postupka, ali je u razgovoru sa Tužilaštvom BiH konstatovano da navedeno pitanje treba delegirati i prema VSTV-u,
- Tužilaštvo je postupajući po preporuci revizije tražilo mišljenje Agencije za javne nabavke u vezi sa nabavkom usluga ekshumacije, ali zbog prirode predmeta nabavke nije proveden postupak nabavke navedenih usluga,

## 3. Sistem internih kontrola

Tužilaštvo BiH je odgovorno za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i pravilima.

Tužilaštvom BiH rukovodi glavni tužilac sa tri zamjenika. Od jula 2011.godine glavni tužilac je bio pod suspenzijom, a Odlukom VSTV<sup>2</sup> jedan od zamjenika glavnog tužioca imenovan je na poziciju v.d. glavnog tužioca i isti je tokom 2012.godine obavljao navedenu dužnost.

Tužilaštvo BiH primjenjuje dva zakona kada je u pitanju obračun plaća i naknada zaposlenih i to Zakon o plaćama i naknadama u institucijama BiH i Zakon o plaćama i drugim naknadama u sudskim i pravosudnim institucijama na nivou BiH.

Shodno tome u realizaciji izdataka Tužilaštvo BiH primjenjuje akte Vijeća ministara za dio zaposlenih koji plaće primaju po Zakonu o plaćama i naknadama u institucijama BiH a za zaposlene po Zakonu o platama i drugim naknadama u sudskim i pravosudnim institucijama na nivou BiH postoje drugačija rješenja kada su određene vrste naknada u pitanju (npr. regres za godišnji odmor).

Kada je u pitanju funkcionisanje sistema internih kontrola ističemo pitanje koje je i u ranijem periodu bilo predmetom revizijskih razmatranja.

---

<sup>2</sup> Visoko sudsko i tužilačko vijeće BiH

Naime, Zakonom o krivičnom postupku BiH, tačnije članom 185. stav 4. propisano je da se troškovi krivičnog postupka i neophodni izdaci postavljenog advokata isplaćuju unaprijed iz sredstava Tužilaštva BiH, odnosno Suda BiH, a naplaćuju se kasnije od osoba koje su dužne da ih nadoknade po odredbama istog zakona. Organ koji vodi krivični postupak (u konkretnom slučaju Tužilaštvo BiH) dužno je da sve troškove koji su unaprijed uplaćeni unese u popis koji se prilaže spisu.

Članom 188. stav 1. istog zakona propisano je da će, u situaciji kad Sud BiH optuženog proglašiti krivim, u presudi izreći da je isti dužan da nadoknadi troškove krivičnog postupka.

Tokom obavljanja revizionih postupaka, a na osnovu obavljenih intervju sa odgovornim licima u Tužilaštvu BiH, mogao se steći utisak da nadležni tužioci troškove krivičnog postupka dokumentuju i dostavljaju Sudu BiH uz krivični spis.

U određenim slučajevima, prema dobijenim informacijama, presudama Suda BiH okrivljena strana je obavezana da nadoknadi u cijelosti ili djelimično troškove krivičnog postupka. Postoje i slučajevi gdje Sud BiH lice koje je proglašeno krivim oslobodi troškova postupka na osnovu člana 188. stav 4. Zakona o krivičnom postupku.

Uzimajući u obzir navedeno, tokom revizije je konstatovano da Tužilaštvo BiH ne posjeduje formirane evidencije o podnesenim troškovima krivičnog postupka po predmetima, od Suda BiH prihvaćenih i presudama obuhvaćenih troškova kojim su terećene okrivljene strane, kao i presudama u kojima se strana proglašena krivom oslobađa plaćanja troškova postupka.

#### 4. Budžet

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2012. godinu<sup>3</sup> Tužilaštvo BiH su odobrena sredstva iz budžeta u iznosu od 8.959.000 KM.

Zahtjev za budžet je iznosio 9.508.283 KM, a budžet je odobren u iznosu od 8.959.000 KM u (okviru kojeg i 100.000 KM za rad Udarne grupe) od toga na tekuće izdatke odnosi se 8.948.000 KM a na kapitalne izdatke 11.000 KM.

Izvršenje budžeta Tužilaštva BiH sa 31.12.2012. iznosilo je 8.373.789 KM što je manje od odobrenog budžeta za 585.211 KM, ili što predstavlja 93 % realizacije budžeta.

Realizacija izdataka je izvršena u rasponu od od 63 % koliko je na izdacima za tekuće održavanje, do 100 % na poziciji izdaci za telefonske usluge.

Izvršeno je jedno prestrukturisanje rashoda po odluci Ministarstva finansija i trezora od 17.12.2012.godine u iznosu od 63.500 KM i to sa pozicije: bruto plate i naknade iznos od 63.500 KM, na pozicije: putni troškovi iznos od 20.000 KM, telefonske i poštanske usluge iznos od 10.000 KM, energiju i komunalne usluge iznos od 2.000 KM, nabavku materijala iznos od 31.500 KM.

- **Plan rada i Izvještaj o radu**

**Plan rada:** Tužilaštvo BiH je u aprilu 2012.godine donijelo Plan rada za 2012.godinu. U Planu rada značajan dio zauzimaju poduzete aktivnosti u 2011.godini. U planu aktivnosti za 2012.godinu navedeni su ciljevi i aktivnosti za postizanje tih ciljeva.

---

<sup>3</sup> Službeni glasnik BiH, broj 42/12

Vijeće ministara Bosne i Hercegovine je usvojilo 2009. godine, Strategiju za borbu protiv korupcije 2009-2014 godine i Akcioni plan za provedbu strategije koji podrazumijevaju preuzimanje proaktivne uloge prema prevari i korupciji, odnosno izradu politike i strategije institucije u sprječavanju korupcije; jačanje svijesti i povećanje odgovornosti u korištenju javnog novca; uticaj na transparentnost svih postupaka, te predočavanje rezultata rada.

Uloga Ureda za reviziju institucija BiH u suzbijanju rizika za pojavu prevare i korupcije dominantno je usmjerena na osiguravanje vladavine prava i transparentnosti u radu i trošenju javnih sredstava. Ured za reviziju stoga provjerava da li su uspostavljeni i da li dobro funkcionišu sistemi i procedure interne kontrole koji će spriječiti prevaru i korupciju ili umanjiti prostor za takvo djelovanje

Tokom revizije, konstatovao je da Tužilaštvo BiH nema sačinjen plan djelovanja shodno ciljevima navedenim u dokumentima Vijeća ministara BiH, koji bi značio već izgrađene kapacitete za efikasno provođenje programa za prevenciju korupcije, educiranje osoblja Tužilaštva BiH i podizanje svijesti o rizicima od korupcije, a bez navedenog nije moguće provesti neophodne aktivnosti u oblasti prevencije korupcije i koordinaciju borbe protiv korupcije.

***Preporučujemo Tužilaštvu BiH usvajanje akcionog plana kojim bi bili obuhvaćeni ključni ciljevi iz pomenute Strategije, sa utvrđenim linijama odgovornosti i vremenskim okvirom za implementaciju, osiguravanje dobrog upravljanja i efikasnog provođenja istog, te izradu periodičnih izvještaja u kojima bi se naveo napredak u odnosu na svaki ključni prioritet koji je u fazi provođenja.***

***U provođenju preporuke Tužilaštvo BiH bi trebalo osigurati potrebnu koordinaciju sa Agencijom za prevenciju korupcije i koordinaciju borbe protiv korupcije u cilju što efikasnije borbe protiv korupcije i njene prevencije i osiguranja konzistentnosti i održivih rezultata aktivnosti provedenih u sklopu navedene Strategije.***

Strateško planiranje u Tužilaštvu BiH sa jasnim i operativnim rješenjima, adekvatnom politikom razvoja, koja bi podrazumijevala određena prestrukturiranja postojećih kapaciteta bi trebalo voditi poboljšanju učinkovitosti i kvaliteta rada, posebno kada se uzme u obzir značaj i uloga Tužilaštva BiH, tekući priliv predmeta u Tužilaštvo BiH kao i broj predmeta koji su na obradi iz ranijeg perioda.

Tokom obavljanja revizije konstatovao je da Tužilaštvo BiH zajedno sa Sudom BiH ima srednjoročni plan razvoja za period 2011.-2013.godina u kojem su navedeni okviri rashoda u navedenom periodu, implementacija plana te pregled prioriteta institucija.

**Informacija o radu:** Tužilaštvo BiH je u aprilu 2013.godine sačinilo Informaciju o radu za 2012.godinu koju je dostavilo Parlamentarnoj skupštini BiH na razmatranje. U informaciji o radu Tužilaštva navedene su aktivnosti provedene u 2012.godini sa naznačenim brojem predmeta koji su bili na rješavanju po Odjelima.

Prema sadržaju Informacije o radu Ured registrara prestao je 31.12.2012.godine sa pružanjem podrške radu Tužilaštva BiH. Prestanak pružanja podrške od strane Ureda registrara tekao je sukcesivno, u skladu sa izlaznom strategijom ove institucije.

## **5. Pregled rashoda budžeta**

Ukupni rashodi Tužilaštva BiH u 2012. godini iznose 8.373.789 KM od toga se na tekuće izdatke odnosi 8.364.494 KM a na kapitalne izdatke 9.295 KM.



## 5.1. Tekući izdaci

- **Bruto plaće**

Ukupno ostvarene bruto plaće i naknade iz plaća iznose 6.767.130 KM. Sa 31.12.2012. godine Tužilaštvo BiH je imalo ukupno 175 zaposlenih i to 159 na neodređeno vrijeme i 16 na određeno vrijeme. Prema sistematizaciji su predviđena 204 radna mjesta. U toku 2012. godine je bilo angažovano 10 pripravnika kojima su istekli ugovori o radu.

U toku 2012. godine Tužilaštvo BiH je napustilo 21 lice, a primljeno je 12 lica. Bilo je više internih premještanja na osnovu provedenog postupka po internim oglasima.

U Tužilaštvu BiH je izvršeno povećanje plaća u 2012. godini u iznosu od 2,26% budući da odredbe člana 6. Zakona o plaćama i drugim naknadama u sudskim i pravosudnim institucijama na nivou BiH između ostalog predviđa, da će se, počevši od godine koja uslijedi nakon godine u kojoj prosječna mjesečna neto plaća u BiH izračunata za kalendarsku godinu po prvi put dostigne ili pređe iznos od 800 KM, osnovna mjesečna plaća tužilaca korigovati za procenat povećanja.

**Stimulacije:** Tužilaštvo BiH je u 2012. godini izvršilo isplatu stimulacija zaposlenim u ukupnom neto iznosu od 31.800 KM. Razlog za isplatu stimulacije je izuzetno zalaganje uposlenih na inicijativu neposrednih rukovodilaca i angažman u komisijama za javne nabavke. Stimulacije su isplaćene za ukupno 72 uposlenu, a kretale su se u rasponu od 300 KM do 600 KM, s tim da se ukupni godišnji isplaćeni iznos po zaposlenom kreće od 300 KM do 1.400 KM.

**Refundacije bolovanja:** Tužilaštvo BiH podnosi zahtjeve za refundacije bolovanja preko 30 i 42 dana i ukupan podneseni iznos za 2012. godinu prema podacima Tužilaštva BiH iznosi 18.016 KM. Zahtjevi za refundacijom se priznaju od strane nadležnih entitetskih institucija ali se refundacije izvršavaju samo iz Federacija BiH. Na Kolegiju v.d. glavnog tužioca od 24.04.2012. godine donesen je zaključak da se instrukcija MFT o refundaciji bolovanja ne odnosi na zaposlenike koji platu primaju po Zakonu o platama i drugim naknadama u sudskim i tužilačkim institucijama na nivou BiH, nego samo na zaposlenike koji platu primaju po Zakonu o platama i naknadama u institucijama BiH te se za njih treba primjeniti član 12. ovog zakona koji upućuje na primjenu entitetskih zakona.

- **Naknade troškova zaposlenih**

Naknade troškova zaposlenih ostvarene tokom 2012. godine iznose 383.709 KM. Značajne naknade odnose se na izdatke za prijevoz sa posla i na posao (73.628 KM), topli obrok (123.271 KM), regres (140.440 KM) i otpremnine zbog odlaska u mirovinu (8.782 KM).

**Izdaci za regres (140.440 KM):** Članom 8. stav 3. Zakona o platama i drugim naknadama u sudskim i tužilačkim institucijama na nivou BiH propisano je da sve sudije i tužioci imaju pravo na neto naknadu za godišnji odmor u iznosu od 50% osnovne mjesečne plate iz tačke a) član 2 ovog zakona (4.200 KM).

Tužiocima je isplaćen regres za godišnji odmor u iznosu od 2.147 KM, što predstavlja 50% osnovne mjesečne plaće iz tačke a) člana 2. Zakona o plaćama i drugim naknadama u sudskim i tužilačkim institucijama na nivou BiH. Ostalim zaposlenima koji plaću primaju prema Zakonu o plaćama i drugim naknadama u sudskim i tužilačkim institucijama na nivou BiH isplaćen je iznos od 50% njihove osnovne mjesečne plaće (isplaćeni iznosi kreću se u rasponu od 716 KM do 1.534 KM). Zaposlenima sa srednjom stručnom spremom, za koje se



primjenjuje Zakon o plaćama i naknadama u institucijama BiH, izvršena je isplata regresa u iznosu od 300 KM.

**Topli obrok (123.271 KM):** Izdaci za topli obrok se isplaćuju u skladu sa podzakonskim aktom koji definiše isplatu toplog obroka za državne službenike u iznosu od 6 KM.

- **Putni troškovi**

Ukupno ostvareni putni troškovi u 2012. godini iznose 170.055 KM. Od toga, troškovi putovanja u zemlji iznose 76.498 KM, a troškovi putovanja u inostranstvu 93.557 KM.

Službena putovanja u Tužilaštvu BiH se odnose najviše na istražne radnje po pojedinim predmetima, kao i na prisustvo regionalnim seminarima, konferencijama, radnim sastancima i sl.

Ističemo da su se tokom 2012. godine za sudije, tužioce i određenu kategoriju stručnog osoblja Tužilaštva BiH obračunavale dnevnice za službena putovanja u Bosni i Hercegovini u iznosu od 50 KM obzirom da je Visoko sudsko i tužilačko vijeće Bosne i Hercegovine tek 21.12.2012. godine donijelo Pravilnik o izmjeni pravilnika o naknadama putnih troškova za službena putovanja sudija, tužilaca i određenih kategorija stručnog osoblja u sudskim i pravosudnim institucijama na nivou Bosne i Hercegovine kojim se naprijed navedenoj kategoriji mijenja nivo dnevnice sa 50 KM na 25 KM.

Za ostale uposlenike Tužilaštva BiH primjenjivala se Odluka o visini dnevnica za službena putovanja zaposlenima u institucijama Bosne i Hercegovine u zemlji od 25 KM.

Visoko sudsko i tužilačko vijeće Bosne i Hercegovine je tek 29.01.2013. godine donijelo Pravilnik o izmjeni pravilnika o naknadi putnih troškova za službena putovanja sudija, tužilaca i određenih kategorija stručnog osoblja u sudskim i pravosudnim institucijama na nivou Bosne i Hercegovine, kojim se naprijed navedenoj kategoriji mijenja visina dnevnica za službena putovanja u inostranstvo za svaku zemlju pojedinačno i koja je usklađena sa Odlukom o izmjenama Odluke o visini dnevnica za službena putovanja zaposlenim u institucijama Bosne i Hercegovine donesene od strane Vijeća ministara BiH (ista se počela primjenjivati od 01.05.2012. godine).

- **Izdaci telefonskih i poštanskih usluga**

Izdaci telefonskih i poštanskih usluga ostvareni u 2012. godini iznose 69.011 KM. Značajni troškovi odnose se na izdatke za fiksne telefone (35.467 KM), mobilne telefone (7.069 KM), troškove interneta (2.146 KM) i izdatke za poštanske usluge (24.329 KM).

Prema internom aktu, ograničenja troškova mobilnog telefona propisana su kako slijedi: glavnom tužiocu pripada naknada u iznosu od 400 KM u zemlji i 500 KM u inostranstvu; dežurnim tužiocima u ukupnom iznosu od 400 KM u zemlji; rukovodiocu odjela-portparolu u zemlji i inostranstvu u iznosima od po 50 KM. Odobrava se korištenje službenih mobilnih telefona u svrhu provođenja posebnih istražnih radnji-praćenja i naknada ostvarenih mjesečnih troškova u iznosu do 20 KM kao i korištenje mobilnih telefona prilikom obavljanja posebnih poslova, a po nalogu glavnog tužioca i naknada ostvarenih mjesečnih troškova u iznosu do 100 KM. Vozačima Tužilaštva BiH odobrava se naknada mjesečnih troškova korištenja vlastitih mobilnih telefona za službene potrebe u iznosu do 30 KM.

Članovima Udarne grupe (20 lica) odobren je mjesečni iznos troškova mobilnog telefona do 61 KM.

Kada su u pitanju troškovi fiksnih telefona, internim aktom su propisana ograničenja troškova fiksnih telefona i to: za glavnog tužioca i tehničkog sekretara-ukupno do 200 KM, zamjeniku glavnog tužioca i rukovodiocima tužilačkih odjela do 100 KM, tužiocima do 80 KM, sekretaru do 60 KM, stručnim savjetnicima i istražiocima do 50 KM, stručnim saradnicima-pravnicima i šefu pisarne do 35 KM, stručnim savjetnicima-prevodiocima, stručnim savjetnicima-analitičarima, višim stručnim saradnicima do 30 KM, stručnim saradnicima-koordinatorima predmeta i referentima specijalistima do 25 KM, višim referentima, referentima i daktilografima do 25 KM, zaposlenicima koji uz radno mjesto zadužuju i fax dodatnih do 30 KM te zaposlenicima koji zadužuju fax sa drugim brojem u odnosu na telefon (koriste svi zaposlenici)-fax do 50 KM.

Fakturisanje troškova za fiksne telefone Tužilaštvu BiH vrši Ured registara gdje se u prilogu fakture dostavlja pregled potrošnje po svim ekstenzijama u okviru Tužilaštva BiH.

- **Izdaci za nabavku materijala**

Ukupni izdaci za nabavku materijala ostvareni su u iznosu od 123.889 KM. Najznačajniji izdaci se odnos na kompjuterski materijal (67.681 KM), kancelarijski materijal (29.507 KM) i materijal za čišćenje (11.390 KM).

- **Izdaci za upotrebu vozila**

Ukupni izdaci za upotrebu vozila iznose 57.882 KM. Najznačajniji troškovi odnose se na gorivo (27.359 KM), održavanje vozila (19.028 KM), osiguranje vozila (7.416 KM).

Tužilaštvo BiH raspolaže sa 8 službena vozila. Pravo na korištenje službenih vozila ima glavni tužilac, a ostali zaposleni u Tužilaštvu BiH prema ukazanim potrebama.

Osim toga vozila se dodjeljuju na upotrebu tužiocima koji su pod neposrednom fizičkom zaštitom.

- **Ugovorene usluge**

Izdaci za ugovorene usluge ostvareni su u iznosu 632.836 KM. Značajni troškovi odnose se na usluge štampanja (13.677 KM), usluge javnog informisanja i odnosa sa javnošću (11.329 KM), usluge reprezentacije (8.717 KM), usluge prevođenja (12.137 KM), stručne usluge (168.850 KM), troškove svjedoka (28.217 KM), troškove ekshumacija (366.803 KM) i ugovore za privremeno i povremeno obavljanje poslova (10.057 KM).

**Troškovi ekshumacija (366.803 KM)** se odnose na isplate na osnovu rješenja a po ispostavljenim fakturama na ime troškova ekshumacije ljudskih ostataka na različitim lokalitetima, kao i na isplate licima koja su uključena u obavljanje poslova ekshumacije i sudsko-medicinske obrade posmrtnih ostataka. Ispostavljene fakture se potpisuju od strane lica koja su vršila kontrolu istih. Dnevnice licima koji se angažuju na ekshumacijama iznosile su 50 KM i iste su sa izmjenom Odluke o visini dnevnica u zemlji korigovane na 25 KM.

**Stručne usluge-vještaci (168.850 KM)** Tužilaštvo BiH je 02.08.2011. godine donijelo Odluku o formiranju Komisije za ocjenu osnovanosti visine troškova i nagrade vještaka za izradu nalaza i mišljenja. Odluka o utvrđivanju kriterija za određivanje visine nagrade (naknade) za izradu nalaza i mišljenja vještacima raznih struka donesena je 16.01.2012. godine i ista je stupila na snagu danom donošenja.

Troškovi vještačenja knjiže se na osnovu troškovnika vještaka koji ocjenjuje komisija i rješenja nadležnog tužioca, koji daje saglasnost na ispostavljeni troškovnik (račun).

Iz revidiranog uzorka možemo zaključiti da je prema mišljenju Komisije za ocjenu osnovanosti visine troškova ispostavljene račune vještaka trebalo korigovati i do 50 %, što je

kasnije uglavnom i usvajano kao konačani iznos za isplatu koji je odobravao v.d. Glavnog tužioca.

Za vještačenje se koriste i usluge institucija (Klinički centar, fakulteti..) na komercijalnoj osnovi a predmet vještačenja su npr. usluge DNA vještačenja i sl.

***Preporučuje se Tužilaštvu BiH da u budućim vještačenjima navedenog tipa, gdje postoji mogućnost, maksimalno koristi laboratorije državnih agencija u cilju ostvarenja ušteda po osnovu vještačenja.***

U oktobru 2012.godine na osnovu rješenja isplaćeno je 14.405 KM (razlika neisplaćenih sredstava) pravnom licu po osnovu usluga vještačenja iz 2011.godine, zbog nedostatka sredstava u budžetskoj 2011. godini u kojoj je isplaćen iznos od 40.000 KM.

**Troškovi reprezentacije (8.717 KM):** Ukupno realizovani troškovi reprezentacije u 2012. godini iznose 8.717 KM. Internim aktom utvrđeni su novčani iznosi dozvoljenih mjesečnih troškova za glavnog tužioca: troškovi reprezentacije koji se odnose na korištenje usluga bifea u kompleksu pravosudnih institucija do iznosa 1.000 KM; troškovi reprezentacije van sjedišta Tužilaštva unutar zemlje do iznosa 500 KM i troškovi reprezentacije u inostranstvu do 300 EUR.

Tužilaštvo BiH vodi evidenciju o mjesečnim izdacima za reprezentaciju kao i evidenciju o nabavljenim i datim poklonima. Iz navedene evidencije je evidentno da se najveći realizirani iznos ovih troškova evidentira kao „ostalo“, a odnosi se na troškove u zemlji uz koje se donosi odluka o odobravanju troškova. Svi izdaci za troškove reprezentacije se odobravaju na osnovu prethodno donesene odluke.

**Usluge prevođenja (12.137 KM):** Usluge prevođenja se odnose na isplate stalnim sudskim tumačima. Prevodioce bira tužilac koji je nadležan za određeni predmet. Na osnovu dostavljenog troškovnika (računa) za usluge prijevoda, glavni tužitelj daje suglasnost za plaćanje, nakon čega se donosi rješenje o isplati. Odlukom o izmjeni Odluke o naknadi troškova krivičnog postupka prema Zakonu o krivičnom postupku BiH od 09.10.2012. godine propisana je naknada sudskim tumačima.

**Ugovori za privremene i povremene poslove (10.057 KM):** Navedeni izdaci odnose se na naknadu za rad volontera (6 lica ) u periodu januar-oktobar. Ugovori o volonterskom radu zaključuje se na određeno vrijeme i traje 24 mjeseca. Volonteru za njegov rad pripada pravo na naknadu u iznosu 25% od osnovne plaće stručnog suradnika, i nema pravo na ostale naknade predviđene Zakonom o plaćama i naknadama u institucijama BiH.

## 5.2. Kapitalni izdaci

Ukupni kapitalni izdaci ostvareni tokom 2012. godine iznose 9.295 KM a odnose se na nabavku kompjuterske opreme.

## 6. Bilans stanja

Ukupna aktiva Tužilaštva BiH na 31.12.2012. godine iznosi 389.022 KM i odnosi se na novčana sredstva (13.304 KM), kratkoročna potraživanja (6.335 KM) i neotpisanu vrijednost stalnih sredstava (369.383 KM).

- **Stalna sredstva**

**Pitanje smještaja Tužilaštva BiH:** Tužilaštvo je smješteno u objektu bivše kasarne Viktor Bubanj u Sarajevu u ulici Kraljice Jelene 88. Prostorije na navedenoj lokaciji koristi i VSTV i Sud BiH.

Naime, prema odluci Visokog predstavnika u BiH objavljenoj u Službenom glasniku broj: 33/02 utvrđeno je pravo vlasništva i pravo korištenja određenih zgrada i zemljišta u kompleksu "Ramiz Salčin" (bivša "Viktor Bubanj") u Sarajevu za potrebe Suda i Tužilaštva BiH i drugih pravosudnih institucija.

Na osnovu navedene odluke izvršen je upis u zemljišne knjige pomenutih zgrada i zemljišta u korist *Države Bosne i Hercegovine – Zajedničkih institucija BiH 1/1*.

Tužilaštvu BiH je na ime smještaja (isti bi se iselili sa postojeće lokacije – zgrada Suda BiH) odobreno višegodišnje kapitalno ulaganje u cilju opremanja i drugih aktivnosti na objektu (u neposrednoj blizini postojeće lokacije) u kojoj je smještena Specijalna policija FMUP-a.

U 2012.godini uz pomoć VSTV provedene su aktivnosti na izradi idejnog projekta rekonstrukcije pomenute zgrade i aktivnosti u vezi s tim je provelo VSTV.

Vlada FBiH vezano za navedeno pitanje je 06.02.2013.godine donijela odluku o davanju na privremeno korištenje drugog objekta Specijalnoj policiji FMUP-a te su se na taj način stvorili uslovi za oslobađanje prostora u kojem se trenutno nalaze.

**Stalna sredstva Ureda registrara:** Uzimajući u obzir činjenicu da je Ured registrara prestao sa davanjem podrške Tužilaštvu BiH sa 31.12.2012.godine kako je to i planirano, te da dio osoblja iz Ureda registrara prelazi u Tužilaštvo BiH, kao i da se imovina istog prenosi na pravosudne institucije, samim tim dio imovine će biti dodijeljen Tužilaštvu BiH.

***Shodno navedenom neophodno je sva pokretna sredstva koja su predmetom primopredaje između Ureda registrara i Tužilaštva BiH identifikovati pojedinačno, popisati i nakon toga evidentirati u modul stalnih sredstava u okviru ISFU sistema.***

Ukupna pasiva Tužilaštva BiH na dan 31.12.2012.godine iznosi 649.949 KM i odnosi se na kratkoročne tekuće obaveze prema dobavljačima u iznosu od 229.046 KM, obaveze prema djelatnicima u iznosu od 51.520 KM i izvore sredstava 369.383 KM.

- **Kratkoročne tekuće obaveze**

Kratkoročne tekuće obaveze odnose se na obaveze prema pravnim licima (194.816 KM) i obaveze prema fizičkim licima (34.230 KM) koje su iskazane sa stanjem na dan 31.12.2012.godine i iste su izmirene u narednoj godini prem dinamici dospijeća.

- **Popis sredstava, obaveze i potraživanja**

Tužilaštvo BiH je izvršilo popis sredstava, obaveza i potraživanja i revizijom nisu uočene značajnije nepravilnosti.

**Bilans stanja na 31.12.2012. godine prikazan je u Tabeli II u prilogu Izvještaja.**

## 7. Javne nabavke

Tužilaštvo je u 2012. godini izvršilo nabavke u ukupnoj vrijednosti od 242.190 KM. Procedure nabavki su provedene za 10 postupaka putem konkurentskog zahtjeva (221.205 KM) a putem direktnog sporazuma nabavljeno je roba i usluga u vrijednosti od 20.985 KM.

U 2012. godini je revidiran iznos od 141.882 KM koji se odnosi na zaključene ugovore nakon provedenog postupka putem konkurentskog zahtjeva.

Poništenje postupka javne nabavke bilo je u slučaju nabavke usluga održavanja vozila zbog nedovoljnog broja kvalifikovanih ponuđača.

Procedure javnih nabavki u Tužilaštvu provode komisije imenovane od strane Glavnog tužioca.

Revizijom primjene ugovora o javnim nabavkama nisu uočena odstupanja u cijenama i količinama isporučenih roba i usluga u odnosu na ugovoreno.

Prilikom revizije pojedinačnih procedura konstatovane su slabosti i nedostaci vezani za sljedeće nabavke:

**Nabavka usluga održavanja vozila:** Provedena je procedura putem konkurentskog zahtjeva. U prvom pokušaju koji je proveden bez objave obavještenja o nabavci donesena je odluka o poništenju postupka zbog nedovoljnog broja ponuda.

U drugom pokušaju kada je izvršena i dodatna objava izabran je najpovoljniji ponuđač.

Konstatovano je da je vršena korekcija prvobitno planiranog iznosa za održavanje i servisiranje vozila. Ugovoreni iznos prelazi planirani za cca 6.000 KM. Ukupno ponuđeni iznos se odnosi na 34 dijela za svako vozilo te bi teoretski posmatrano ukoliko je ugovor ograničen na ponuđeni iznos sa zamjenom svih dijelova jedanput po vozilu u vrijeme trajanja ugovora bio potpuno realizovan ugovor u kojem ne bi bilo mjesta za plaćanje usluga servisiranja izuzev za samo 1 norma sat.

Uočeno je da cijena norma sata nije adekvatno vrednovana kroz proceduru javne nabavke, obzirom da je postojao rizik da se ponudi cijena koja bi bila znatno iznad prosjeka a da u konačnom zbiru ukupna ponuda bude najpovoljnija.

Ponude koje su od strane ponuđača evidentirane na isti dan (posljednji dan za dostavom ponuda) dostavljene su u razmaku od 3 minute

***Proceduru javnih nabavki vezanu za održavanje vozila potrebno je provoditi na način koji će omogućiti izbjegavanje mogućih rizika zaključenja ugovora po cijenama koje su više od tržišnih.***

***Preispitati prijem ponuda u isto vrijeme (razmak od tri minuta).***

***Razmotriti dodatnu objavu u slučajevima kada su nabavke sa stanovišta vrijednosti značajnije, kako ne bi došlo do ponavljanja postupka kada se ide i na objavu.***

## 8. Ostalo

- **Udarne grupa za borbu protiv trgovine ljudima i organizovane ilegalne imigracije**

Ukupno realizovana sredstva po osnovu aktivnosti Udarne grupe u 2012. godini iznose 98.285 KM. U strukturi troškova najveći udio imaju troškovi ugovora o djelu (članovi Udarne grupe i administrativno osoblje) u iznosu od 68.400 KM, izdaci za troškove mobilnih telefona od 15.898 KM te putni troškovi u iznosu od 1.350 KM.



**Ugovori o djelu (68.400 KM):** Ugovori o djelu odnose se na naknade članovima Udarne grupe i to: 350 KM za Glavnog tužioca, 300 KM mjesečno za članove, te 200 KM za lice koje obavlja administrativno-tehničke i računovodstvene poslove.

## 9. Korespondencija

Tužilaštvo BiH nije u ostavljenom roku dostavilo komentare na Nacrt izvještaja o reviziji za 2012. godinu, tako da ovaj Izvještaj predstavlja konačan izvještaj bez korekcija u odnosu na Nacrt izvještaja o reviziji za 2012. godinu.

**Vođa tima za  
finansijsku reviziju**

Nedžad Hajtić, viši revizor

**Rukovodilac Odjela za  
finansijsku reviziju**

Miro Galić, viši revizor

**Članovi tima:**

Fatima Mehanović, revizor

Lutvija Šrndić, pomoćni revizor

**Rukovodilac Odjela za  
razvoj, metodologiju i  
kontrolu kvaliteta**

Dragoljub Kovinčić, viši revizor



### **III PRILOG**

## **FINANSIJSKI IZVJEŠTAJI I IZJAVA O ODGOVORNOSTIMA**



## Izjava o odgovornostima rukovodstva

Međunarodni standard vrhovnih revizionih institucija (ISSAI 1580) predviđa da revizor treba da dobije odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo **Tužilaštva Bosne i Hercegovine** (u daljem tekstu: Tužilaštvo BiH) dužno je da osigura da finansijski izvještaji za 2012. godinu budu izrađeni u skladu sa Zakonom o finansiranju institucija BiH (Službeni glasnik BiH broj 61/04, 49/09 i 42/12), Pravilnikom o finansijskom izvještavanju institucija BiH (Službeni glasnik BiH broj 33/07, 16/10) i Pravilnikom o računovodstvu sa računovodstvenim politikama i procedurama za korisnike budžeta institucija BiH (Protokol Ministarstva finansija i trezora BiH broj 01-08-02-1-644-1/12 od 20.01.2012. godine). Rukovodstvo je također obavezno da postupa u skladu sa Zakonom o budžetu institucija BiH i međunarodnih obaveza BiH za 2012. godinu (Službeni glasnik BiH broj 42/12) i pratećim uputstvima, objašnjenjima i smjernicama koje donosi Ministarstvo finansija i trezora BiH, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja Tužilaštva BiH.

Pri sastavljanju takvih finansijskih izvještaja odgovornosti rukovodstva obuhvataju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije.
- da se u poslovanju primjenjuju važeći zakonski i drugi relevantni propisi;

Rukovodstvo je također odgovorno za čuvanje imovine i resursa od gubitaka, pa tako i za preduzimanje odgovarajućih mjera da bi se spriječile i otkrile pronevjere i ostale nezakonitosti.

Datum, \_\_\_\_\_

Glavni tužilac

\_\_\_\_\_

**Pregled rashoda budžeta za 2012. godinu**

**Naziv institucije: TUŽILAŠTVO BIH**

Tabela I

Opis	Odobreni budžet	Usklađivanja budžeta	Ukupni budžet (2+3)	Izvršenje budžeta	Index 5/4
1	2	3	4	5	6
<b>1. Tekući izdaci</b>	<b>8.948.000</b>	<b>0</b>	<b>8.948.000</b>	<b>8.364.494</b>	<b>93</b>
Bruto plaće i naknade	7.247.000	-63.500	7.183.500	6.767.130	94
Naknade troškova zaposlenih	460.000		460.000	383.709	83
Putni troškovi	182.000	20.000	202.000	171.405	85
Izdaci telefonskih i pošt.usluga	75.000	10.000	85.000	84.909	100
Izdaci za energiju i kom. usluge	51.000	2.000	53.000	48.723	92
Nabavka materijala	95.000	31.500	126.500	123.889	98
Izdaci za usl. prijevoza i goriva	37.000		37.000	29.462	80
Unajmljivanje imovine i opreme			0		
Izdaci za tekuće održavanje	53.000		53.000	33.607	63
Izdaci za osiguranje	8.000		8.000	7.787	97
Ugovorene i druge posebne usluge	740.000		740.000	713.874	96
<b>2. Kapitalni izdaci</b>	<b>11000</b>	<b>0</b>	<b>11.000</b>	<b>9.295</b>	<b>85</b>
Nabavka zemljišta			0		
Nabavka građevina			0		
Nabavka opreme	11.000		11.000	9.295	85
Nabavka ostalih stalnih sredstava			0		
Rekonstrukcija i invest.održavanje			0		
<b>3. Tekući grantovi</b>	<b>0</b>	<b>0</b>	<b>0</b>	<b>0</b>	<b>0</b>
			0		0
			0		0
<b>4. Višegodišnja kapitalna ulaganja</b>	<b>0</b>	<b>0</b>	<b>0</b>	<b>0</b>	<b>0</b>
			0		0
<b>5. Novčane donacije</b>	<b>0</b>	<b>0</b>	<b>0</b>	<b>0</b>	<b>0</b>
			0		0
<b>Ukupno (1+2+3+4+5)</b>	<b>8.959.000</b>	<b>0</b>	<b>8.959.000</b>	<b>8.373.789</b>	<b>93</b>

Rukovodstvo je Pregled rashoda budžeta po ekonomskim kategorijama odobrilo

2013. godine.

Glavni tužilac:

**Bilans stanja na 31.12.2012. godine**

**Naziv institucije: TUŽILAŠTVO BIH**

Tabela II

Opis	31.12.2011	31.12.2012.	Index 3/2
1	2	3	4
<b>1. Gotovina, krat.potraživanja, razgraničenja i zalihe</b>	<b>17.150</b>	<b>19.639</b>	<b>115</b>
Novčana sredstva	14.662	13.304	91
Kratkoročna potraživanja	2.488	6.335	255
Kratkoročni plasmani			
Interni finansijski odnosi			
Zalihe			
Kratkoročna razgraničenja			
<b>2. Stalna sredstva</b>	<b>495.393</b>	<b>369.383</b>	<b>75</b>
Stalna sredstva	1.536.009	1.547.335	101
Ispravka vrijednosti	1.040.616	1.177.952	113
Neotpisana vrijednost stalnih sredstava	495.393	369.383	75
Dugoročni plasmani			
Dugoročna razgraničenja			
<b>UKUPNO AKTIVA (1+2)</b>	<b>512.542</b>	<b>389.022</b>	<b>76</b>

<b>3. Kratkoročne obaveze i razgraničenja</b>	<b>840.193</b>	<b>280.566</b>	<b>33</b>
Kratkoročne tekuće obaveze	247.430	229.046	92
Kratkoročni krediti i zajmovi			
Obaveze prema zaposlenima	592.463	51.520	9
Interni finansijski odnosi			
Kratkoročna razgraničenja			
<b>4. Dugoročne obaveze i razgraničenja</b>	<b>0</b>	<b>0</b>	<b>0</b>
Dugoročni krediti i zajmovi			
Ostale dugoročne obaveze			
Dugoročna razgraničenja			
<b>5. Izvori sredstava</b>	<b>495.393</b>	<b>369.383</b>	<b>75</b>
Izvori sredstava	495.393	369.383	75
Ostali izvori sredstava			
Neraspoređeni višak prihoda/rashoda			

<b>UKUPNO PASIVA (3+4+5)</b>	<b>1.335.586</b>	<b>649.949</b>	<b>49</b>
------------------------------	------------------	----------------	-----------

**Napomena:** Pravilnikom o finansijskom izvještavanju institucija Bosne i Hercegovine, čl.8. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou budžeta institucija Bosne i Hercegovine za tekuću godinu biti uravnotežen.

Rukovodstvo je Bilans stanja odobrilo

2013.godine

Glavni tužilac: